



universum orbem semper implevit, & adhucdum implet, & quidem iis auxiliis, quae Christus praescripsit. 6. In quo reliquum est privilegium doctrinam praedicatam miraculis confirmandi & ardor vitam pro fide profundendi. 7. A quo recedentes semper pro heterodoxis ab optimo quoque omnium seculorum reputati sunt & damnati. 8. Hae omnes quin & plures praerogativae conveniunt soli Romano-Catholicae Ecclesiae.

C A P U T I.

DOG MATA THEORETICA RELIGIONIS REVELATAE.

De Deo Uno. I. **S**tabilita veritate religionis Catholicae nunc singulatum dogmata hujus religionis consideranda sunt, & contra omnis generis adversarios propugnanda: sunt autem ex iis quaedam theoretica & quaedam practica, de theoreticis primum, tum de practicis. Deus existit & est unus. (h) 2. Est ens in omni genere perfectionis infinitum, est nempe spiritus, immutabilis, immensus, aeternus, omnipotens (i) &c. 3. Intellectu perfectissimo cognoscit & comprehendit se & omnia extra se, quaecunque & quoctunque modo a perfectissimo ente cognosci possunt. 4. Datur etiam in Deo scientia, quae ratione objecti dividitur in necessariam, contingentem, simplicis intelligentiae & visionis. (k)

De Deo Tri-
no. II. Quemadmodum religio Christiana Deum unum certissime credit; ita tres in divinis esse, Patrem nempe,

Fi-

(h) Absurda polytheismi jam in initio christiana religionis detecta sunt a Justino, Tertulliano, Lactantio & aliis passim.

(i) Deus potest plura & majora iis, quae fecit; hic igitur mundus non est perfectissimus.

(k) De Scientia media certant Theologi & adhuc sub judice lis est; ego cum sola dogmata defendere statuerim, cuivis parti suum jus relinquo, quodsi tamen sicut in hac, sic & in aliis controversiis theoreticis illi parti favero, quae mihi aptior videtur ad explicanda dogmata, id me sine omni praejudicio adversae partis facturum esse protestor: in practicis tamen controversiis paulo aliter me geram.

Filium & Spiritum S. nunquam non professa est & profitetur. 2. Filius existit per generationem a Patre: Spiritus S. procedit a Patre & Filio per actum voluntatis, qui dicitur spiratio. (l) 3. Pater, Filius, & Spiritus S. in divinis a se distinguuntur. 4. Sunt res subsistentes sive personae. 5. Quaelibet ex his personis est verus Deus. 6. Igitur cum unus tantum Deus sit, hae tres Personae consubstantiales sint, oportet.

III. Deus creavit coelum & terram, & omnia quae in eis sunt (m) & quidem ad gloriam suam. 2. Hinc non reliquit res a se creatas sine sua cura, sed omnia tanquam providus pater gubernat, & ad scopum praefixum dirigit. (n) 3. Inter res creatas primas obtinenter angeli, qui sunt spiritus omnis corporis expertes, & homines, qui ex corpore & spiritu immortali compositi sunt. 4. Ut utrosque utpote liberos productos in officio contineret, proposuit ipsis praemium & poenam, & utrumque aeternum. 5. Praemium illud erat communio felicitatis, qua Deus ab aeterno felix erat, & ideo omnem naturae creatae exigentiam excedebat. (o) 6. Ad id praemium obtainendum eos habiles fecit gratia, quae dicitur sanctificans. 7. Ad hanc gratiam conservandam addidit necessarium auxilium, quo eam retinere possent, si vellent, perdere tamen etiam cum eodem poterant. 8. Magna pars angelorum rebellis effeta gratiam eam perdidit, & in poenam aeternam detrufa est. 9. Major pars angelorum in officio permanxit & ideo praemium illud aeternum obtainuit. 10. Felices illi spiritus nunc mittuntur in ministerium propter eos, qui haere-

*De DEO
Creatore.*

(l) Jure optimo addita est a Latinis symbolo Constantinopolitano particula *Filioque*.

(m) Igitur mundus non est ab aeterno.

(n) Fatum, casus, fortuna &c. soni sunt sine re significata.

(o) Quemadmodum nempe felicitas Dei consistit in sui contemplatione & amore, sic etiam hae creaturae rationales eandem Dei contemplationem intuitivam praefixam habent, & certis conditionibus consequentur. 2. Qua felicitate ut frui possint, adjuvabitur natura auxilio a Deo, quod a Theologis dicitur lumen gloriae.



haereditatem capiunt salutis, ita ut singulis hominibus singulari tutores ex iis destinentur. 11. Homo etiam inobedientis factus gratiam illam amisit, & non sibi tantum, sed etiam posteris suis, ita ut haec labes non tantum ab ipso, sed etiam a posteris omnibus contracta sit. (p) 12. Poenae scelus illud infsecutae fuere mors naturalis, & qui illam antecedit omnis exercitus morborum & malorum naturalium; effrenis porro inclinatio in voluptates sensuum, ignorantia magna rerum tum ad mores tum ad vitam ordinandam necessariarum, & demum infirmitas singularis superandi molestias in via virtutis occurrentes & resistendi blanditiis vitorum. 13. Relictum tamen est liberum arbitrium sed male saucium. 14. Ad bona enim moralia parum erat, ad bona supernaturalia nihil. 15. Spectata potentia ejus physica peccata vitare poterat omnia; si vero modo humano res spectetur, non poterat totam legem naturalem implere, nec etiam singulas leges in casu magnae difficultatis. (q)

*De Deo Re-
demptore.*

IV. Conditio hominis paulo ante descripta utique miserrima erat; sed misertus est Deus & dedit illis denuo potestatem filios Dei fieri, quod quomodo factum sit, nunc videndum est. Potuisset Deus homini gratis condonare offendam & sic illum in gratiam admittere. 2. Noluit tamen aliter nisi satisfactio condigna offerretur, & sic necessaria erat persona satisfaciens aequalis Deo. 3. Satisfactiōnem praefandam in se suscepit secunda in Trinitate Persona, Verbum nempe, quod caro factum est. 4. Verbum hoc assumpsit veram humanitatem ex Maria Virgine illaefa matris integritate. (r) 5. Unio inter utramque naturam facta fuit in personalitate divina; ita tamen, ut maneret discreta utraque natura & utriusque naturae voluntas &

ope-

(p) Excipiens tamen est ille, qui peccatum non novit, & propter honorem Domini etiam ejus sanctissima Mater.

(q) Sic spectavit Augustinus liberum arbitrium in disputatione contra Pelagianos, qui illud utique omni gratia interna, saltem voluntatis, vacuum volebant; sed revera nunquam homo sine omni gratia fuit.

(r) Injurii sunt in divinam Matrem, qui integritatem per miraculum a Christo servatam postea per matrimonii usum laesam existimant.

operatio. 6. Possunt ea, quae sunt propria humanitati, affirmari de iis, quae sunt propria divinitati, & vicissim in concreto; non tamen cum Ubiquitis in abstracto. 7. Christus etiam homo est verus ac naturalis Dei Filius, & ideo absolute adorandus. 8. Factus est obediens (*s*) usque ad mortem, mortem autem crucis.

V. Christus per mortem suam proprie satisfecit tum pro peccato ab Adamo descendente, tum etiam pro peccatis unicuique propriis. 2. Placavit Deum & simul meruit, ut gratia per Adamum perdita denuo donaretur a Deo humano generi. 3. Gratia illa est duplex, sanctificans & actualis. 4. Sanctificans mundat hominem interius a peccatis, & aequo interne sanctum ac habilem reddit ad aeternam felicitatem, ac prima gratia Adamum. 5. Gratia actualis præveniens pellit ignorantiam per illustrationes in- & externas; infirmitatem vero voluntatis sublevat per pias affectiones eidem immisgas. 6. Addita etiam est gratia adjuvans, quae hominem in ipso bono opere laborantem sustentat. 7. Atque sic reparatum est liberum hominis arbitrium, ut possit denuo vel consentiendo gratiae & bene agendo vitam aeternam mereri, vel dissentiendo & male agendo aeterna supplicia incurgere. (*t*) 8. Non tamen restitutum est illud aequilibrium voluntatis, quod Adamum quasi medium inter bonum & malum collocabat, ut eadem facilitate, quidquid vellet, eligeret. 9. Relicta est nempe inclinatio prona (*u*) ad malum, a bono autem aversio difficultatem pariens. 10. Relicta sunt etiam mala naturae, quin & ipsa mors naturalis

De effectibus mortis Christi.

(*s*) In concilianda libertate Christi cum mandato subeundi mortem, utor ea sententia, quae mandatum medium consilium inter & præceptum strictum admittit.

(*t*) Non tamen per quemlibet actum malum homo gratia Dei excidit, & aeterna supplicia meretur, sed dantur etiam peccata ita dicta venialia, quae ex natura sua temporaneae quidem, non tamen aeternae poenae obnoxia sunt.

(*u*) Haec inclinatio ad malum dicitur concupiscentia, cuius actibus si non consentitur, nullo modo peccatur.



turalis ad tempus, (x) tum ut homo sentiret, quam malum, & amarum esset a Deo recessisse, tum ut occasio esset per tribulationes introeundi in regnum caelorum, tum praeципue, ut virtus gratiae Christi ostenderetur, quae habita & usurpata aculeos dolorum & mortis hebetat & infringit. 11. Haec est redemptio, ex qua suppeditantur omnibus auxilia sufficientia ad salutem operandam. (y) 12. Ideo etiam nunc post lapsum Adae Deus vult omnes homines salvos fieri, & neminem a regno caelorum excludit, nec excludere decernit, nisi propter & post praescita demerita.

*De sacra-
mentis ge-
neratim.*

VI. Consideratum redemptionis beneficium utique maximum, & de se sufficientissimum ex omnium Christianorum sententia nihil operatur, nisi applicetur & quasi proprium reddatur singulis: de modo tantum, quo id applicetur quaestio est & controversia. Senza Ecclesiae Catholicae, quantum assequi potui, hic dabo. 1. Praeter alios modos, quibus applicari posset hoc beneficium, religionis nostrae author voluit, ut id fieret per aliquos ritus in sensu incurrentes a se electos & stabiliter institutos (z). 2. Hic ritus vocantur sacramenta, quorum Ecclesia Catholica septem credit. 3. His ritibus ita annexuit suam gratiam, ut si in nomine Christi applicentur, (a) eam conferentis nec improbitas, nec sinistra fides impedire possit. (b) 4. Requiri-

(x) Nam resurrectio mortuorum omnium futura mortem & ejus effectus illis cum foenore reparabit, qui se, dum viverent, redemptione non indignos praestitere.

(y) Amplius quid a Deo nemo exigere potest, quodsi igitur quisdam praet aliis favet dando gratias efficaces & donum perseverantiae, quae ex mera liberalitate dantur, aliis injuriam non facit.

(z) Consistunt hi ritus in applicatione certarum rerum sensibilium, quae dicuntur materia, & in certis verbis consecratoriis, quae dicuntur forma. 2. Si res probe spectetur ad sacramentum N. L. tria requiruntur, α) ut sit signum sensibus obnoxium, β) ut habeat promissionem gratiae, γ) ut sit institutum a Christo.

(a) Ex hoc capite requiritur in ministro intentio, hos ritus ut sacros Christi nomine conferendi.

(b) Peccat utique, qui res sacras tam profanus atrectare audet.

quiritur in recipiente adulto voluntas suscipiendi sacramenta & alia quaedam dispositio, sed ea nec meretur gratiam, nec causa illius est, sed tantum conditio, sine qua gratia sacramentalis non confertur. (c) 5. Aliqua ex his sacramentis hominem consecrant, & deputant ad certum munus & obligationem subeundam, quae consecratio & deputatio fit per characterem animae impressum. (d) 6. Character non impeditur improbitate recipientis, nec etiam deletur improbitate postea superveniente. 7. Alia ex his sacramentis instituta sunt ad gratiam non habitam acquirendam, alia ad habitam augendam & conservandam. 8. Ad priorem effectum institutus est baptismus & poenitentia; baptismus quidem ad acquirendam gratiam primam & remissionem peccatorum cum originalis, tum personalium ante baptismum perpetratorum: poenitentia vero ad recuperandam gratiam post baptismum deperditam, & remissionem peccatorum post illum commissorum. 9. Dispositio ad utrumque sacramentum ex Tridentino fere est eadem in adultis. (e) 10. Requiritur nempe in utroque vera fides tanquam fundamentum ceterorum omnium. 11. Accedit spes, amor divinus initialis (f) & dolor de peccatis cum voluntate vitam in melius commutandi. (g) 12. Praemissa

*Sacramenta
mortuorum.*


(c) His duabus propositionibus complexus sum id, quod Catholici volunt, dum sacramenta ex opere operato gratiam conferre dicunt.

(d) Haec sacramenta sunt tria nempe baptismus, confirmatio, & ordo. 2. Certum est, haec tria sacramenta valide conferri, etiamsi defectu dispositionis gratiam non conferant. 3. Ex communissima tamen Theologorum sententia conferunt gratiam postea, quando dispositio ponitur, quod volunt, dum dicunt, sacramenta haec reviviscere.

(e) In parvulis, quibus, licet a parentibus fidelibus prognati sint, baptismus etiam conferri debet, non datur neque etiam requiritur ulla dispositio.

(f) Mihi sufficit amor concupiscentiae.

(g) Haec dispositio peccatum non est, igitur non omnia, quae agit scelus peccata sunt.



missa haec dispositio non operatur gratiam, nisi sequatur suscep^tio sacramenti. (h)

Baptismus.

VII. Baptismus conferendus est in aqua naturali. 2. Ablutioni adjungenda est consueta forma expressis singulatim tribus Personis. 3. Haec duo si fiant, a quocunque demum fiant, valet baptismus. 4. Efficit baptismus plenam peccatorum remissionem etiam quoad poenam, (i) renovationem hominis interiorem per gratiam justificantem cum donis annexis, dein initiat eum sacris Christianis, confert jus ad reliqua sacramenta &c. 5. Poenitentiae sacramentum praeter dispositionem supra dictam requirit jure divino confessionem omnium peccatorum gravium (k) quoad numerum & speciem, (l) quantum humana diligentia sciri possunt. 6. Hoc sacramentum non a quovis, sed ab eo solum confici (m) potest, qui speciali ordinatione a Deo facultatem accepit. 7. Talis minister exercet nomine Christi actum Jurisdictionis, & ideo utendum est verbis sententiam judiciale enuntiantibus. 8. Integritas hujus iudicii reconciliatorii requirit praeterea, ut ad satisfactionem imponatur poenitenti aliqua poena delictis proportionata. 9. Effectus hujus sacramenti est reconciliatio cum Deo per restitutionem gratiae, & remissionem peccatorum quoad culpam & poenam saltem aliquam. 10. Pro reliquis poenitentia.

(h) Nisi praecessisset actus charitatis perfectae cum dolore ex eadem charitate profecto & voto suscipiendi sacramentum: tum enim vero gratia statim donatur, relicta tamen obligatione suscipiendi sacramentum.

(i) Quem utique effectum nec virtus nec sacramentum poenitentiae semper operantur, sed relinquunt plerumque poenam pro peccatis remissis ad tempus sustinendam.

(k) Mea quidem sententia etiam dubiorum.

(l) Etiam quoad adjuncta, quae non mutant speciem, si malitiam multum augent.

(m) Neque sufficit sola ordinatio, sed requiritur praeterea Jurisdictio, & post Tridentinum etiam approbatio Episcopi, excipe illos, quos Tridentinum excipit.

Poenitentia.

nis expiandis reliquit Christus Ecclesiae potestatem ex thesauro meritorum ejus succurrendi iis, qui per opera poenalia eas expiare student; ex fragilitate tamen vel brevitate vitae expiare non omnes possunt. 11. Quae non expiantur in hac vita, in alia materiem purgatorio subministrant.

VIII. Non sufficiebat Deo, ut homo per haec duo sacramenta sanctitatem acquireret, sed voluit praeterea, ut acquisitam ad finem usque vitae conservaret, & augeret; ideo instituit Christus alia quaedam sacramenta, quae rite suscepit ad hunc finem conducerent. 1. Hoc omnia commune habent, quod pro dispositione postulent in recipiente statum gratiae & intentionem suscipiendi sacramentum. 2. Quod augeant gratiam & sanctitatem jam antea habitam. 3. Quod conferant homini jus ad certas gratias actuales suo tempore dandas a Deo. 4. Inter haec dignitate & excellencia eminet Sacramentum Eucharistiae. 5. Hoc Sacramentum nempe non tantum significat & confert ut cetera gratiam, sed ipsum corpus & sanguinem Jesu Christi, & quod consequens est, ipsum auctorem gratiae vere & re ipsa praesentem sifit & continet. 6. In nihilum quippe rediguntur panis & vinum, in quibus symbolis hoc mysterium consecrandum est; (n) & succedit in locum ipsorum corpus & sanguis Christi, quod omnipotentiae divinae opus Ecclesia Catholica recte transubstantiationem appellat. 7. Verba, quibus consecratur panis, sunt haec: Hoc est corpus meum, vel his aequivalentia. 8. Verba, quibus consecratur vinum sunt haec: Hic est calix sanguinis mei, vel hic est sanguis meus. (o) 9. Ecclesia Catholica verba Christi proprie intelligens semper credidit Christum jam ante usum Sacramenti adesse. 10. Ex hoc sequitur Catholicos bene

B 3

fa-

Eucharis-
tia.

(n) Panis ex interpretatione Ecclesiae debet esse triticeus, & ex ejus praecepto pro Ecclesia Latina azymus.

(o) Sunt ex Catholicis qui praeter haec verba adhuc alia requirunt, quorum sententiae sicut non contradico, sic nec consentio. Illud sciunt sacerdotes, enunciandam esse sub obligatione gravi formam integrum in Missali praescriptam.



facere, quod Eucharistiam adorent; solenniter circumstent &c. 11. Minister hujus Sacramenti non est quivis Christianus, sed soli Sacerdotes ad id consecrati. 12. Effectus hujus sacramenti est augere gratiam, & praebere quasi generale pharmacum adversus omnia, quae sanctitati adverfantur. 13. Ad confirmandum Christianum in fide & retinenda & profitenda, quae utique res specialem difficultatem continet, instituit Christus sacramentum confirmationis. 14. Hoc Sacramentum conferendum est per impositionem manuum & unctionem Chrisimatis ab Episcopo benedicti cum certa verborum formula. 15. Minister ordinarius est solus Episcopus.

Extrema Unctione. 16. Ad armandum hominem adversus pericula peccandi in vicinia mortis satis frequentia, deinde ad reliquias peccatorum expellendas & ipsa peccata occulta remittenda institutum est a Christo Sacramentum extremae unctionis. 17. Conferendum est hoc Sacramentum per unctionem, quae fit oleo benedicto in sensibus humanis cum certa oratione. 18. Minister hujus Sacramenti est solus sacerdos.

Ordo. 19. Ad statum clericalem & illius munia rite obeunda, praecipue ad conficienda certa Sacraenta habilitatur & roboratur Christianus per Sacramentum a Christo institutum, quod dicitur Ordo. 20. Ratio Sacramenti praecipue habetur in Episcopatu & Sacerdotio. (p) 21. Hujus Sacramenti capaces sunt soli marres Christiani. 22. Ritus praecipuus est impositio manuum cum certa formula verborum. (q) 23. Minister hujus Sacramenti est solus Episcopus, qui ratione ordinis jure divino praecedit sacerdotes. 24. Jus designandi personas, quibus hoc Sacramentum conferendum est, relictum est a Christo superioribus Ecclesiae. 25. Tandem etiam non praeteritus est status conjugalis, qui sicut frequentissimus inter Christianos, ita multis periculis & molestiis circumseptus singularibus auxiliis indiget. 26. Haec auxilia Christus conferre voluit non novum ritum instituendo, sed con-

(p) De Diaconatu tamen res etiam satis expedita est, de reliquis ordinibus videtur deesse ratio sufficiens id affirmandi.

(q) De aliis ritibus disputatur, utrum essentiales sint, nec ne; fensa mea interrogatus dabo.

contractui matrimoniali gratias suas annexendo. 27. Hac ratione iste contractus, qui antea profanus erat, loquendo de Christianis sacer & Sacramentum evasit. 28. Huic igitur Sacramento leges & solennitates soli illi scribere possunt, quibus jus factorum (r) competit. 29. Hoc Sacramentum omnes suscipere possunt, qui non sunt impediti, vel natura, vel jure divino, vel ecclesiastico. (s) 30. Jure divino matrimonium non potest esse nisi inter marem unum & foemina unam. 31. Matrimonium si ratum solummodo sit, dissolvi potest professione religiosa. (t) 32. Consummatum si sit, jure divino insolubile est. *

IX. Hi sunt modi praecipui, quibus gratia ex opere operato, ut dicimus, crescit & augetur. Potest tamen etiam ex opere operantis augeri per alia opera pia; sed de his nunc aget

C A P U T II.

DOGMATA PRACTICA RELIGIONIS REVELATAE.

I. Jesus Christus non tantum redemptor, sed etiam legislator fuit. 2. Legem Mosaicam abrogavit: 3. Retinuit tamen & denuo confirmavit legem naturae. 4. Statuit legem fidei, & obligationes, fidei & religioni annexas. 5. Ceremonialibus plurimis V. L. substituit in sua lege per paucas ceremonias relicta superioribus Ecclesiae potestate plures pro rerum adjunctis statuendi. 6. Politicas

Leges in genere.

(r) Idem dicendum est de sponsalibus, quae sunt via ad hoc Sacramentum.

(s) Hoc Sacramentum non requirit mea sententia speciale ministerium, sed ipsi suscipientes sunt ministri.

(t) Probabilius etiam dispensatione Pontifica.

* De matrimoniis Protestantium in Germania & aliis regionibus ad septentrionem videtur satis jam expeditum esse, non impediri illa impedimentoo clandestinitatis; quod alia impedimenta ecclesiastica concernit, res adhuc anceps est; probabile tamen puto, quod non impediatur.